



UKA 2021/82

29. juli 2021

UPA 2022/82

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppar�:

**Kinguaassiutitigut peqquserlunnikut sakkortunerusumik pineqaatissinneqarsinnaalernissaat pillugu  
Naalakkersuisut Naalagaaffimmi oqartussaasunut saaffiginnissuteqarnissaat pillugu Inatsisartut  
aalajangiiffigisassaattut siunnersuut.**

(Atassutip Inatsisartuni ilaasortaatitai)

### **Tunngavilersuut**

Ajoraluartumik nunatsinni kinguaassiutitigut atornerluisarnerit suli ajornartorsiutaasorujussuupput, naak innuttaasuniit qinikkanillu aaqqiinissamut iliuuseqarnissamullu piumassuseq annertugaluartoq.

Kinguaassiutitigut peqquserlunnernik appartitsiniaanermut iliuuserineqarsinnaasunut arlaliusut ilaattut una siunnersuut isigneqassaaq. Pingaaruteqarportaaq allatigut aamma pinaveersaartitsineq akiuinissarlu iliuuseqarfingissallugu.

Innuttaasullu ukiorpassuarni sakkortunerusumik pinerluuteqartunut pineqaatissiisalernissaq noqqaassutigalugu suaartartuaraluartut suli annerusumik uagut qinikkat allannguisimanngilagut. Massakkut ataatsimoorluta Naalagaaffimmi oqartussaasunut suaarutigisigu sakkortunerusumik pineqaatissiisoqartalernissaa kissaatigalugu.

Sakkortunerusumilli pineqaatissiignnarneq imminik iluaqutaanavianngilaq rehabilitering ilangutinngikkaanni. Sivisunerusumik pinerluuteqartut inuiaqatigiinni aqqusinikkullu takussaanngippata innarligaasunut toqqisisimanarerussasoq naatsorsuutigisinhaavarput. Kiisalu sivisunerusumik pineqaatissinneqarnerani piffissaq sivisunerusoq atorlugu tarnip pissusaanik suliaqartumiit pinerluuteqartoq ikiorneqartassagaluarpoq.

Siunertaavormi pinerluuteqarnikoq inuiaqatigiinnut akuuleqqikkuni uteqqiasumik pinerloqqinnginnissaa. Innarlerneqarsimasullu sapinngisamik annertunerpaamik toqqisisimanissaat, ikiorserneqarluarnissaallu.

Minnerungitsumillu pingaaruteqarluinnarpoq innarligaasut ikiorserluarneqartarnissaat, sapinngisamik aniguisinnaanissaq anguniarlugu.



**Aningaasatigut ingerlatsinikkullu pisortanut kingunerisassai:**

Naatsorsutigineqassaaq Naalakkersuisoqarfimmiit Naalagaaffimmi oqartussanut saaffiginninnissamut 100.000kr-nit aningaasartuitigineqassasut, tassa AC-Fuldmægtigep ukiup 1/12-ia.

**Namminersortunut aningaasarsiornikkut allaffissornikkullu kingunerisassai:**

Soqanngilaq.

**Innuttaasunut aningaasarsiornikkut allaffissornikkullu kingunerisassai:**

Soqanngilaq.